




Općina  
**Stari Grad**  
Sarajevo

# KALENDAR

OBILJEŽAVANJA  
ZNAČAJNIH  
HISTORIJSKIH  
DOGAĐAJA,  
DATUMA I  
LIČNOSTI

# Važniji datumi Općine Stari Grad Sarajevo

<b>15.01.</b>	<i>Masakr u ulici Isevića sokak kod broja 23. Ubijeno osam građana 1993. godine</i>
<b>27. 01.</b>	<i>Dan sjećanja na žrtve Holokausta</i>
<b>05.02.</b>	<i>Masakr na pijaci Markale. Ubijeno 68 građana 1994. godine</i>
<b>05.02.</b>	<i>Dan sjećanja na sve ubijene i ranjene građane Sarajeva u agresiji u periodu 1992-1995. godina</i>
<b>01.03.</b>	<i>Dan nezavisnosti Bosne i Hercegovine</i>
<b>05.04.</b>	<i>Oslobođenje grada Sarajeva od fašističke okupacije 1945. godine</i>
<b>06.04.</b>	<i>Dan grada Sarajevo</i>
<b>02.05.</b>	<i>Dan Općine Stari Grad Sarajevo</i>
<b>05.05.</b>	<i>Dan sjećanja na ubijenu djecu Sarajeva</i>
<b>09.05.</b>	<i>Dan Evrope i pobjede nad fašizmom</i>
<b>15.05.</b>	<i>Pogibija komandanta Envera Ene Šakića „Zelene beretke“ 1992. godine</i>
<b>18.05.</b>	<i>Postrojavanje Prve brigade policije „Stari Grad“ na Trgu oslobođenja - Alija Izetbegović</i>
<b>18.05.</b>	<i>Pogibija Frederica Mauricea delegata Crvenog krsta na Višegradskoj kapiji 1992. godine</i>
<b>27.05.</b>	<i>Masakr u ulici Ferhadija. Ubijeno 26 građana 1992. godine</i>
<b>30.05.</b>	<i>Pogibija 29 pripadnika Prve brdske brigade Stari Grad 1993. godine</i>
<b>30.05.</b>	<i>Dan maloljetnog borca</i>
<b>08.06.</b>	<i>Godišnjica stradanja 25 pripadnika Zelenih beretki i 2 komandanta na Kovačima 1992. godine</i>
<b>08.06.</b>	<i>Vojna akcija „Trebević-Zlatište“ 1992. godine</i>
<b>09.06.</b>	<i>Godišnjica masakra u ulici Sedrenik broj 171. Ubijeno četvero građana 1992. godine</i>
<b>12.06.</b>	<i>Masakr na groblju Budakovići. Ubijeno deset građana 1993. godine</i>
<b>16.06.</b>	<i>Godišnjica pogibije komandanta Alije Miladina 1992. godine</i>
<b>17.06.</b>	<i>Godišnjica formiranja 2. Brdske brigade 1. Korpusa ARBiH 1992. godine</i>
<b>25.06.</b>	<i>Masakr u ulici Dženetića čikma. Ubijeno tri građanina 1995. godine</i>
<b>26.06.</b>	<i>Masakr u ulici Bakarevića do broja 5. Ubijeno sedam građana 1993 godine</i>
<b>05.08.</b>	<i>Odbrana Starog Grada iz pravca Trebević-Bistrički potok</i>
<b>23.08.</b>	<i>Masakr u ulici Halači kod broja 5, Ubijeno osam građana 1992. godine</i>
<b>28.08.</b>	<i>Masakr u ulici Mula Mustafe Bašeskije do broja 64 – sjeverni ulaz u Gradsku tržnicu. Ubijeno 43 građanina 1995. godine</i>
<b>01.09.</b>	<i>Osnivanje Prvog korpusa ARBiH 1992. godine</i>
<b>19.10.</b>	<i>Godišnjica smrti prvog predsjednika predsjedništva Alije Izetbegovića 2003. godine</i>
<b>26.10.</b>	<i>Godišnjica pogibije devet policajaca MUP-a RBiH 1993. godine</i>
<b>02.11.</b>	<i>Godišnjica osnivanja 115. brdske brigade 1992. godine</i>
<b>25.11.</b>	<i>Dan državnosti Bosne i Hercegovine</i>
<b>14.12.</b>	<i>Masakr u ulici Gimnazijska – kod OŠ „Safvet-beg Bašagić“. Ubijeno osam građana 1993. godine</i>



*Pred Vama je Kalendar obilježavanja značajnih historijskih događaja, datuma i ličnosti Općine Stari Grad Sarajevo. S ciljem očuvanja kulture sjećanja, Općina Stari Grad Sarajevo obilježava sve značajne datume iz prošlosti i čuva od zaborava heroje i šehide odbrambeno-oslobodilačkog rata.*



**27.01.1945.**

## DAN SJEĆANJA NA ŽRTVE HOLOKAUSTA

Ovaj dan se širom svijeta obilježava u znak sjećanja na 27. januar, 1945. godine kada su jedinice Sovjetske armije oslobodile najveći nacistički koncentracioni logor - Aušvic, nakon čega se saznalo za stravična događanja u tom, ali i drugim sličnim logorima širom Evrope. Počast se odaje na spomeniku žrtvama nacističkog progona koji se nalazi na Starom jevrejskom groblju "Borak" u Sarajevu.



**15.01.1993.**

## MASAKR U ULICI ISEVIĆA SOKAK

Granatom ispaljenom sa agresorskih položaja, 15.01.1993. godine ubijeno je osam Sarajlija u ulici Isevića sokak kod broja 23, od kojih dvoje djece. Još 19 naših sugrađana tada je teže i lakše ranjeno dok su čekali u redu za vodu.



**05.02.1994.**

## MASAKR NA PIJACI MARKALE

Jedan od najvećih zločina u historiji glavnog grada BiH se desio na Pijaci Markale, 05. februara, 1994. godine. Tog dana je od minobacačke granate kalibra 120 milimetara ispaljene s položaja Vojske Republike Srpske ubijeno 68, a ranjeno više od 140 građana Sarajeva. Općina Stari Grad Sarajevo sagradit će novo, dostojanstveno spomen-obilježje za žrtve zločina na Markalama.



**05.02.1994.**

## DAN SJEĆANJA NA SVE UBIJENE I RANJENE GRAĐANE SARAJEVA U AGRESIJI U PERIODU 1992-1995. GODINA

Skupština Kantona Sarajevo 2007. godine donijela je odluku da se 05. februar proglasi Danom sjećanja na sve ubijene građane Sarajeva tokom perioda 1992/1995. godine.



**01.03.1992.**

## DAN NEZAVISNOSTI BOSNE I HERCEGOVINE

Dan nezavisnosti Bosne i Hercegovine nacionalni je praznik koji se obilježava 1. marta svake godine, a kojim se proslavlja nezavisnost Bosne i Hercegovine od SFR Jugoslavije. Referendum za nezavisnost Bosne i Hercegovine održan je 29. februara i 1. marta, a označio je opredjeljenje građana za budućnost zemlje. Općina Stari Grad Sarajevo u saradnji ovaj datum tradicionalno obilježava programima koji uključuju različite prigodne sadržaje.



**05.04. 1945. i 05.04. 1992.**

## OSLOBOĐENJE GRADA SARAJEVA

5. aprila 1945. godine jedinice 16. muslimanske brigade Narodno-oslobodilačke vojske (NOV) Jugoslavije ušle su u Sarajevo kroz Višegradsku kapiju, prošle kroz Vratnik, a potom sa gradske Vijećnice skinule nacističku zastavu.

5. april 1992.godine je od 2019.godine zvanično utvrđen kao datum koji se obilježava kao Dan početka opsade Sarajeva 1992.-1995. Sarajevo je 1.425 dana bilo u opsadi. Za to vrijeme ubijeno je više od 11 hiljada civila u gradu, od kojih oko 1.600 djece, a više od 50.000 civila je bilo lakše ili teže ranjeno.



**06.04. 1945.**

## DAN GRADA SARAJEVA

6. aprila 1945. godine, Sarajevo je, nakon četvoro-godišnje okupacije, oslobođeno od fašizma. Oslobođanje Sarajeva od fašističke Njemačke tokom Drugog svjetskog rata počelo je 28. marta 1945. godine. Probojem 334. puka obalom Miljacke do Marijin-Dvora u noći 6. aprila završene su ulične borbe u Sarajevu. Do zore je njemačka 181. divizija napustila svoja posljednja uporišta, a u međuvremenu su preko Vraca i Mojčila u južni dio grada ušli i pripadnici 5. crnogorske udarne brigade.



**02.05. 1992.**

## DAN OPĆINE STARI GRAD SARAJEVO

02.05.1992.godine su se vodile presudne bitke za odbranu općine, grada i Države BiH, kada su jedinice tadašnje JNA pokušale zauzeti zgradu Predsjedništva BiH. Tenkovi i oklopni transporteri tadašnje JNA zaustavljeni su naporima branilaca okupljenih u Teritorijalnoj odbrani RBiH. Istog dana JNA je zarobila predsjednika Predsjedništva BiH Aliju Izetbegovića i njegovu delegaciju, koji su se vraćali sa pregovora iz Lisabona. Razmjena za za vojnike JNA, koji su bili zarobljeni u kasarni na Bistriku, obavljena je dan kasnije.



**05.05. 2019.**

## DAN SJEĆANJA NA UBIJENU DJECU SARAJEVA

Vlada Kantona Sarajevo je 2019. godine donijela odluku da će se 05. maj obilježavati kao Dan sjećanja na ubijenu djecu opkoljenog Sarajeva u periodu 1992/1995. U Velikom parku sagrađeno je spomen-obilježje ubijenoj djeci opkoljenog Sarajeva 1992/1995. Tokom opsade Sarajeva ubijeno je 1.601 dijete.



**09.05. 1945. i 09.05.1950**

## DAN EVROPE I POBJEDE NAD FAŠIZMOM

09. maj obilježava se kao Dan pobjede nad fašizmom i dan kada je potpisana bezuvjetna kapitulacija nacističke Njemačke i kraj Drugog svjetskog rata u Evropi. Također, obilježava se i 09. maj, 1950. godine kada je objavljena "Schumanova deklaracija", u kojem se predlaže formiranje jedne vrste evropske federacije kao sredstva za očuvanje mira, što je danas Evropska unija.



**15.05. 1992.**

## POGIBIJA KOMADANTA ENVERA ENE ŠAKIĆA

Enver Šakić poginuo je 15. maja 1992. godine, na Alipašinom Polju. Posthumno je odlikovan, najvišim ratnim priznanjem "Zlatni ljiljan" i "Ordenom za vojne zasluge sa zlatnim mačevima", a dodijeljen mu je čin majora.

U čast legendarnog komandanta jedinice Zelenih beretki „PJAF Bosna 22“ Envera Ene Šakića, sagrađeno je spomen-obilježje u ulici Bistrik, na kući porodice Baličevac. U toj kući je 1991. godine oformljena jedinica „PJAF Bosna 22“, kojom je komandovao Šakić, a ploča je svečano otkrivena 2020. godine.



**18.05. 1992.**

## POSTROJAVANJE PRVE BRIGADE POLICIJE STARI GRAD

Na Trgu oslobođenja - Alija Izetbegović 18. maja, 1992. godine, s ciljem podizanja morala u gradu Sarajevu izvršena je svečana smotra 750 pripadnika Prve brigade policije Stari Grad. Bila je to prva smotra odbrambenih snaga države BiH, a nakon toga uslijedilo je masovno pristupanje građana Sarajeva u redove MUP-a i tadašnje Teritorijalne odbrane, što se pokazalo presudnim za odbranu glavnog grada naše države.



**18.05. 1992.**

## POGIBIJA FREDERICA MAURICEA DELEGATA CRVENOG KRSTA

Frederic Maurice bio je šef Međunarodnog komiteta Crvenog križa u Sarajevu. Tog 18. maja, 1992. godine na jasno označen konvoj Međunarodnog komiteta Crvenog križa, koji je prenosio lijekove za stanovništvo Sarajeva, otvorena je vatra sa položaja Vojske Republike Srpske. U konvoju je bio i 39-ogodišnji Maurice, koji je podlegao od zadobivenih povreda, dok su dva uposlenika ove svjetske humanitarne organizacije ranjena tog dana.



**27.05. 1992.**

## MASAKR U ULICI FERHADIJA

Na samom početku agresije na našu zemlju i grad, 27. maja, 1992. godine ispaljena je granata sa agresorskih položaja na Trebeviću. Projektil je pao u ulicu Ferhadija u blizini velikog broja građana koji su čekali u redu za hljeb. Tog dana, ubijeno je 26 građana Sarajeva, a njih 108 dobili su teške i lakše povrede.



**30.05. 1993.**

## POGIBIJA 29 PRIPADNIKA PRVE BRDSKE BRIGADE STARI GRAD

U borbi za oslobođenje Trebevića, odakle je agresor bombardovao Sarajevo, 30. maja, 1993. godine poginulo je 29, a ranjena su 64 pripadnika Prve brdske brigade Stari Grad. Bez imalo razmišljanja borci su hrabro napadali mnogo opremljenijeg neprijatelja. Zahvaljujući njima i ostalim borcima AR-BiH, agresor nije zauzeo grad.



30.05. 1923

## DAN MALOLJETNOG BORCA

Na 20. sjednici Općinskog vijeća Stari Grad Sarajevo, održanoj 29. novembra, 2022. usvojen je prijedlog Odluke kojom će se 30. maj u Općini Stari Grad Sarajevo obilježavati kao Dan maloljetnog borca. Više od 200 maloljetnih boraca dalo je svoje živote u borbi za slobodu u periodu agresije 1992-1995. godine.



08.06. 1992.

## GODIŠNJICA STRADANJA 25 PRIPADNIKA ZELENIH BERETKI

08. juni, 1992. godine upamćen je kao dan kada je poginulo najviše sarajevske omladine u pokušaju da oslobode svoj grad. Cilj akcije je bilo probijanje čvrstog obruča oko grada, kao i zauzimanje ključnih pozicija agresora sa kojih je granatiran. Tog dana, svoje živote izgubilo je 25 pripadnika „Zelenih beretki“ i dva komandanta borbenih jedinica „Bosnae“: Muhidin Dino Magoda i Sulejman Zolj.



08.06. 1992.

## VOJNA AKCIJA „TREBEVIĆ-ZLATIŠTE“

08. juna, 1992. godine izvedena je vojna akcija razbijanja obruča oko Sarajeva kako bi se presijekla putna komunikacija Lukavica – Pale. Na raskrsnici ulica Hambina carina i Šumarska sagrađeno je spomen-obilježje za šest šehida koji su dali živote u akciji, dok su ranjena 54 borca.





09.06. 1992.

## GODIŠNJICA MASAKRA U ULICI SEDRENIK BROJ 171

U naselju Sedrenik 09. juna, 1992. godine, desio se jedan od najtežih zločina u kojem su agresorske snage granatom usmratile četiri osobe, od kojih troje djece iz jedne porodice - porodice Bojadži. U dvorištu porodične kuće u ulici Sedrenik 171 tog dana ubijeni su braća Fehim (17) i Mirza (12) Bojadži, njihova rodica Amina Bojadži (14), a život je izgubio i 24-godišnji mladić Sakib Prašović.



12.06. 1993.

## MASAKR NA GROBLJU BUDAKOVIĆI

12. juna, 1993 godine granata ispaljena sa srpskih položaja ubila je devet civila koji su se okupili na dženazi rahmetli Fatime Karšić na mjesnom mezarju Budakovići, a 20 ih je teže ili lakše ranjeno.



16.06. 1992.

## GODIŠNJICA POGIBIJE KOMANDANTA ALIJE MILADINA

Alija Miladin, komandant prve protivoklopne jedinice u BiH, poveo je 16. juna, 1992. godine svoje saborce u proboj na linijama odbrane na području Vraca. Te noći zaustavila ga je minobacačka granata ispaljena sa agresorskih položaja koja ga je najprije ranila, a tri dana kasnije i zauvijek ugasila junačko srce ovog velikog čovjeka.



**17.06. 1992.**

## GODIŠNJICA FORMIRANJA 2. BRDSKE BRIGADE

Godišnjica formiranja Druge brdske brigade Prvog Korpusa Armije Republike Bosne i Hercegovine obilježava se 17. juna na Borijama i to na spomen-obilježju sagrađenom 2002. godine u čast 172 šehida i poginula boraca Druge brdske brigade.



**25.06. 1995.**

## MASAKR U ULICI DŽENETIĆA ČIKMA

25.06.1995.godine počinjen je još jedan od brojnih zločina nad najmlađom i najnevinijom populacijom tokom opsade Sarajeva. Tokom igre ispred zgrade ubijene su djevojčice Sidbela (Sabrija) Zimić (1986.), Amina (Adem) Pajević (1984.) i Ljiljana (Zoran) Janjić (1983.) ulici Dženetića čikma.



**26.06. 1993.**

## MASAKR U ULICI BAKAREVIĆA

Na Bistriku ulici Bakarevića gelerima minobacačke granate ispaljene sa položaja vojske RS, 26. juna, 1993. godine ubijeno je sedmero djece. To je jedno od brojnih masovnih stradanja civila koje je počinila agresorska vojska, a čije su žrtve bila djeca.



**05.08. 1992.**

## ODBRANA STAROG GRADA IZ PRAVCA TREBEVIĆ-BISTRičKI POTOK

05. august, 1992. godine urezan je u sjećanje svih građana Sarajeva, posebno Starog Grada, kao period kada su se vodile presudne bitke za zauzimanje Bistrić kule, a samim tim i Starog Grada i Sarajeva. Obilježavanje organizuje Udruženje boraca "Odred Širokača" na lokalitetu Bostarići.



**23.08. 1992.**

## MASAKR U ULICI HALAČI

Na Baščaršiji, u ulici Halači, 23. augusta 1992. godine od minobacačke granate ispaljene sa položaja agrsora ubijeno je osam naših sugrađana. Tog dana ubijene su tri sestre Spahić: Almasa, Mahira i Meliha, te Melihina sedmogodišnja kćerka Esmā, dok je troje građana ranjeno.



**28.08. 1995.**

## MASAKR U ULICI MULA MUSTAFE BAŠESKIJE

Od ispaljene minobacačke granate s agresorskih položaja na Trebeviću, ispred sjevernog ulaza u Gradsku tržnicu Markale, 28. augusta, 1995. godine 43 naša sugrađanina izgubila su život, a 84 osobe su ranjene, od čega troje djece. Masakr kod Gradske tržnice bio je posljednji veliki zločin agresora u opkoljenom Sarajevu. Usljedila je operacija NATO-a „Deliberate force“ (Namjerna sila), a rezultat je bila deblokada Sarajeva i povlačenje artiljerije sa položaja oko glavnog grada naše zemlje.



**01.09. 1992.**

## OSNIVANJE PRVOG KORPUSA ARBIH

Prvi korpus Armije RBiH zvanično je osnovan 01. septembra, 1992. godine. Pripadnici ove vojne formacije dali su nemjerljiv doprinos u odbrani nezavisnosti i cjelovitosti naše domovine. Prvi korpus Armije RBiH bio je okosnica formiranja, stvaranja i razvijanja Armije Republike Bosne i Hercegovine. Pripadnici ovog korpusa su djelovali na ratištima širom BiH, a njih 6.585 je dalo život za slobodnu i nezavisnu Državu Bosnu i Hercegovinu.



**19.10. 2003.**

## GODIŠNJICA SMRTI PRVOG PREDSJEDNIKA PREDSJEDNIŠTVA ALIJE IZETBEGOVIĆA

19.10.2003. godine na bolji svijet preselio je prvi predsjednik Predsjedništva Bosne i Hercegovine Alija Izetbegović. Alija Izetbegović bio je prvi predsjednik međunarodno priznate države Bosne i Hercegovine i vrhovni komandant Armije RBiH tokom agresije na BiH. Rođen je 08. augusta, 1925. godine u Bosanskom Šamcu, a umro je 19. oktobra, 2003. godine u Sarajevu. Sahranjen je na šehidskom mezarju Kovači.



**26.10. 1993.**

## GODIŠNJICA POGIBIJE DEVET POLICAJACA MUP-A RBIH

26.10.1993. godine izvedena je vojno-policajska akcija pod nazivom "Trebević 2" koja je imala za cilj uspostavu reda i vraćanje odmetnutih vojnih grupa u sistem. Tokom izvođenja akcije ubijeno je devet pripadnika Vojne policije Armije RBiH i MUP-a RBiH.



**02.11. 1992.**

## GODIŠNJICA OSNIVANJA 115. BRDSKE BRIGADE

115. brdska brigada bila je vojna jedinica koja je tokom agresije djelovala u sastavu I korpusa AR-BiH. Formirana je kao 1. pješadijska brigada Stari Grad 19. jula, 1992. od Odreda Stari Grad, Odreda Hrid-Jarčedoli, Odreda Mahmutovac i drugih manjih jedinica. U septembru, 1992. preimenovana je u 1. brdsku brigadu i direktno bila potčinjena Štabu Vrhovne komande.



**25.11. 1943.**

## DAN DRŽAVNOSTI BOSNE I HERCEGOVINE

25. novembar, 1943. godine je jedan od najznačajnijih datuma u historiji Bosne i Hercegovine. Na taj dan u Mrkonjić Gradu održano je zasjedanje Zemaljskog antifašističkog vijeća narodnog oslobođenja Bosne i Hercegovine – ZAVNOBIH-a. Na zasjedanju je donesena odluka o obnovi državnosti BiH, potvrđene su njene historijske granice, a Bosna i Hercegovina je definisana kao jedna od šest ravnopravnih republika u tadašnjoj Jugoslaviji. Ono što je najbitnije da je tada odlučeno da BiH bude zajednica u kojoj će biti osigurana puna ravnopravnost svih njenih naroda i narodnosti.



**14.12. 1993.**

## MASAKR U ULICI GIMNAZIJSKA

14. decembra, 1993. godine sa agresorskih položaja na Vracama ispaljena je granata koja je eksplodirala na raskrsnici ulica Gimnazijska i Obala Kulina bana i usmrtila osam, dok je deset građana teže i lakše ranjeno.



# Općina Stari Grad Sarajevo

Služba za odnose s javnošću,  
informacioni sistem

Zelenih beretki br. 4 | 033 / 28 23 00  
info@starigrad.ba | www.starigrad.ba

